

四庫全書

集部

欽定四庫全書

秋澗集卷二十四

元 王惲 撰

七言絕句

寄張孝先

愛而不見我心勞
好在天池刷羽毛
一曲紫簫風露冷
黑山無際月輪高

寄贈王嘉父

十日休閒一到衙
冷官滋味賈長沙
醉歸多趁湖南月
馬上披香直到家

送王子勉天壇行香

山川望秩走星輶
藩府懷賢夢想勞
不為碧鷄金馬異
漢家優禮起王褒

蕭徵君哀詞

東瀛先生有道之士也
余以里閭故獲展履綦之拜
蓋十有一年矣
今茲云亡謹撫其見聞之實作追懷

之詩六首姑達乎感慨云爾

圯上求書約重過
豈期遐想仰山河
適來適去公常事
親見先生曳杖過

含悲空炷影前香
風袂泠然返帝鄉
鶴馭不來塵世隔
芙蓉城闕月茫茫

李白長鯨汗漫期
秋山魂冷未來歸
傷心執紼西川路
何止羊曇淚滿衣

鬱鬱佳城畫不開
玉霄東望靄蓬萊
空懷華表城頭柱

會有他年化鶴來

萬事生平委自然竹風松月共清圓
衣塵纔拂朝元去忍向人間久棄捐

樓觀纔成人已非身前毫髮恨無遺
空餘讀易壇邊竹露葉青青若淚垂

比干墓

玉骨琅琅盡古丘凜然英氣尚橫秋
朱游訕訐何為者敢辱先生地下遊

雪夜

暮雪紛紛亂掩窓
牀頭無酒只空缸
壯懷俱與爐灰冷
惟有詩魔苦不降

旋呵凍筆吟冰柱
急掃風花煮夜茶
客去焚香閉門坐
小齋初不羨山家

八月十四夜與雷彥正步月

秋聲入戶夜蟲多
羣負金樽漾月波
燭暗香殘人欲去
滿庭風露影婆娑

車水

鏡中流水畫中山
酒盡銀餅興未闌
碧玉沼深人不見
柳花飛度翠琅玕

夜過滑州

黑悄軍聲動地來
魏人宵濟宋師迴
而今一統無南北
月下搖鞭過滑臺

跋龍眠二駿圖

玉塞沙平首箔繁
渥洼春水泛晴瀾
幾時扈從長楊獵

一片紅雲拂繡鞍

漢家天子狩陰山
萬馬憑陵汗血殷
早晚華陽春草地
𦍋𦍋得似畫圖間

美人却扇圖

寶檻承恩妬露華
背金翻日羨宮鴉
幽閒好備關雎德
望絕羊車失自誇

絕代佳人擬罕儔
幽閒無夢到河鳩
春風靜鎖昭陽院
落盡庭花轉自愁

游瓊華島

中統元年作

鳥語山容喜客來
耿純襟抱若為開
六龍冷駐陰山雪
暫擬層巔作望臺

芙蓉水殿紫巖松
六月雲蒸比雪宮
樂部不聞清夜曲
舜絃聲裏詠南風

蓬萊雲氣海中央
薰徹瑤華露影香
一炬忽收天上去
謾從焦土說阿房

五雲仙島戴靈鼇
老盡瓊華到野蒿
惆悵津陽門外去

春風飄亂酒旗高

大定明昌五十年論功當出漢唐前
儘消一島承清讌
且置堯階頌采椽

躡盡寒雲最上層
土花春碧夢觚稜
江山如畫人空老
更倚殘陽望道陵

玉樹歌聲繞北壚
朔風吹恨入南都
六鼇不戴三山去
留與都人泣鼎湖

光泰門東日月躔
五雲仙仗記當年
不煩細讀江南賦

老樹遺臺倍黯然

杜莘老荒山訪友圖

隆中人有鹿門期
梁父吟餘獨杖藜
殆似老龐歸向晚
釣船猶艤暮江西

秋懷

效樂天體

閒書遮眼睡昏昏
飽食無茶腹自捫
斜日倚門風乍起
滿庭黃葉擁籬根

早起

星河黯淡湛玄雲露下庭柯落葉紛夜氣遠從天際斂
秋聲時向樹頭聞

冬日與呂丈讀毛詩二十二首

婦道防閑貴有初文姜失御從雲如何殊笱敝梁空在
秋水誠多得計魚敝笱

服御鮮明擬大君
麟麟轂擊汶陽春
載驅既匪勤王事

隱惡能無播萬民

載驅

濟濟儀威美且都
詩人流詠入嗟吁
齊家為失防閑禮

禦亂無多金僕姑 猗嗟

為國規模以德將恬然風俗入安疆新婚服袂既匪禮

葛屨凌霜尤失常 葛屨

汾水悠悠宛一方條桑採蕢僕夫當誰知粲粲輶車子

終日傾筐沮洳旁 汾沮洳

得民方可固邦基此道幽深莫我知却憶賓庭陳百旅

棘桃猶足備多儀 園有桃

地狹民稠十畝間來歸來逝共閑閑何當一復周家制

各守封疆絕往還

十畝之間

邦畿感近四鄰侵行役無時怨抑深陟岵遐瞻私自慰

倚門應甚望雲心

陟岵

不畋安得獸懸門匪稼胡為禾積困但恃鄙貪居祿位

不能無愧伐檀人

伐檀

碩鼠歌詩怨已成三年貫汝未聊生熙熙彼土雖云樂

猶抱遲遲去國情

碩鼠

皂綈示約人從化玉樹歌淫國旋空蟋蟀戒深垂萬世

由來奢儉貴乎中

蟋蟀

隰原尚賴樞榆蔭人主憂勤貴一身堪鄙晉昭徒自苦
只將鐘鼓樂他人

山有樞

鄰鄰白石水揚揚宗國由來日盛強本末倘從師服諫
爭教耦國似田常

揚之水

沃土分封自晉昭子孫蕃衍喻園椒大夫休起盈升嘆

宗本顛披爾遠條

椒聊

東楚綢繆仰見星時危婚嫁禮難成却思王季興岐日

內外俱無怨曠情

綢繆

骨肉凋零失所親徒行踽踽一身存不如杖杜春前樹

枝葉猶能庇本根

杖杜

服御羔裘豹飾祛國人不恤反居居豈無他所攜持去

恩好猶懷未忍疎

羔裘

孝養庭幃士乃常反教執役事戎行悠悠仰面蒼天渺

失所何如鵠在桑

鵠羽

晉國流風屬變攜武公反正思依依誰知問鼎傷肩際

肯獨尊王請命衣無衣

道左漙漙杖杜春清陰猶得庇行人國強須賴羣賢輔
孤特何為任一身有杖之杜

歎生蔓野葛蒙枝女子從人得所依衾枕未溫征役遠
庶幾百歲願同歸葛生

晉獻聽讒似采苓竟從微隱殺申生後王采察能明遠
譖愬雖多自不行采苓

梁園對月

兒時曾住汴梁城二十年來重此行
一片鳳凰池上月
向人還似舊時明

過蕩陰東周留村

一灣流水麥青青楊柳陰中野
竹橫幾樹桃花如舊識
隔溪無語笑相迎

喜蕭茂先得雄

未聽啼聲骨已奇桂林安取野棠枝
老髯嗜學初心在
剩備箱書付阿宜

滿紙新詩美寧馨慰心尤喜老來情壽兒此去如春筍
玉節亭亭脫錦裾

夏夜

野雲明處電飛光海緯青浮落日黃想得近山多雨過
滿庭風竹月波涼

夢中賦月燈詩

風外筠竿倚暮烟忽驚羣日帝堯年天公兩眼何常暗
底用分光照一偏

遊泰山雜詩

胚融萬化羣龍首丘垤諸山五岳宗遺草茂陵欺後世
岱神何意望東封

祖龍東巡檀雄豪風雨天門幾遁逃虞帝不來天自老
秦碑空倚禪壇高

衆山迤邐朝西東帝孫突出天之中巨靈不劈蒼崖斷
雖有絕頂誰能通

何年氣母此融結大小天門五十盤三峰自是神明觀

漠漠陰風走石壇

岱宗巖巖靈氣宅雲烟物外爭新奇
世事難必有如此
吾欲入海從安期

綰茁元氣通滄海霧湧雲蒸一水山
五十連城望霖雨
少分餘潤到人間

萬壑璫林映碧崖雲間三頂鬱霄臺
摩挲御帳殘松樹
曾見秦皇漢武來

路從御帳北艱屯松頂雲癡日脚昏
上盡曲盤十八折

仰看猶自有天門

盪胸滄鬱陰雲生行出天門路漸平脚力有餘中頂近
徘徊應為紀山銘

朝瞰爛爛烘層巔天門直下屯蒼烟乾坤故為作開闔
世界幻入兜羅天

何限詩人不克登杖藜直到最高層壁間速即留題去
雲起封中冷不勝

東山何高四十里萬古通天只一門不知洞府深幾許

宿雲無數儘雄吞

雄觀駭絕東溟日逸駕高於北海鵬更看山靈出奇貨
千巖蒼雪玉稜層

雪林虎跡過新蹄石磴雲蘿步步低多謝山靈相擁護

一杯無事到中溪

中溪神祠名在山門口

贈相者李吉甫

仙機分自洞中春閱盡長安市上人留取神光牛背上
要其著眼過天津

跋豐稔還鄉圖

廟堂真宰拜姚崇
斗米三錢四海同
今日太平應有象
畫家消息恐難工

過邯鄲

層臺高與暮雲齊
全趙河山入望低
貪和野花雙塔句
夕陽又下故城西

我自驅車下九門
眼中襄國動吟魂
從教兩鬢渾如雪
猶喜歸來故步存

黃梁夢短不須驚
滿馬紅塵過趙城
獨上荒臺重惆悵
野烟無處認溫明

題雪谷早行圖

頭痛風災萬里程
行人何限把雙旌
犯寒休訝征車早
冷嶺東邊是帝城

新店看山望京樓

喜入關南百里川
朔風邊雪頓醒然
夕陽欲下蒼烟起
看盡西南破墨山

秋雨靖山道中

一重一掩吾肺腑
老雨荒山記北還
人在碧烟深澗底
仰看元氣擁雲間

酌百泉水

去時蘭佩惹春烟
歸日羸驂跨敗韉
賴有百門山下水
療飢猶可度終年

偶書

郝卿持節使江臯
子勉翱翔主御曹
我幸閉門無一事

醉餐秋菊讀離騷

跋司馬溫公燕處圖

獨樂園深百草香一編心與道相忘不妨臥老琴書裏
破散青苗有百章

道與晴雲任卷舒心存廊廟跡江湖石君被譴公孫死
轉愧先生燕處圖

擁馬留公作帝箴人心大抵是天心惠鄉未死舒王在
一集傳家了古今

壬戌歲除夜

坐久虛窓夜氣澄
未容心事淡於冰
滿襟忠血傷時淚
一點清光教子燈

春風萬里圖

人間塵土日紛拏
流水空山半落花
自是道心游物外
不須誇誕說流沙

蓮社圖二首

人間廬阜東南勝
兩晉名流最賞音
阿麟因之出新意

秋香和月寫東林

鬢絲禪榻喜相同詩在秋香月影中千古風流社中客
不隨江月照還空

跋滄江待渡圖

朝醉新筇暮錦鱗一篙獨占上游行且休熟睡秋蓬底
無限津頭望濟人

隆中高臥恥為邦雪裏呼船渡晚江耆舊幾人堪晤語
徑須特訪鹿門龐

贈別王晉卿

漢署千官列鴈行
九天獨被繡衣光
布衣自笑題詩客
空抱澄清望八荒

青鎖仙郎被服新
寵光千丈爛盈門
何時得侍紅雲表
竭節同酬一命恩

劍履翩翩趣北歸
秋衾日夜夢彤幃
長楊輦路都門柳
恰及飛花點繡衣

挽蘭同知進之

留心藥籠緣多病歷任鄰藩便暮年回首西州門外道
偃然長寢兩相捐

行年六十不為殀貳政三州有足稱伯道有兒終抱恨
夜窻無及讀書燈

一丘黃土清溪曲三尺蒼髯六十身千古桐鄉遺愛在
只須秋草臥麒麟

得調澶淵幾載考自營墓穴已三年幾回對客親曾說
埋近清溪性所便

翩翩老騎赴征車前日東城別路隅酒榼素筍今寂寞
河山依舊繞黃壚

戊辰後正月七日雪

北風一雪麥田空坑谷堆平滿棘叢近日化工無素物
總將春色到蒿蓬

戊辰門帖子

安分愛尋蕭遠論廣騷慵讀楚臣辭里人莫訝三冬蟄
一寸丹心用有時

送劉主簿文遠赴都

仕途坦坦駕輕車殆似劉君赴部除
不枉洛南溫處士
半生清苦待徵書

終南捷徑霾荒霸吏部銓衡到至公
相過不須論出處
季鷹門巷幾秋風

除官限自三年例計月須憑一考優
聞說聖皇思治切
夢賢無夜不岩幽

貢壁輪琛買煦濡萬言不博一除書
秋風兩戒河山底

自把鋤犁計未疎

求官自古近長安
格法如應事不難
說與磻溪溪上叟
且須寧耐把魚竿

題薛微之遺安堂

靜思富貴履危機
醉著人心死不知
愛殺遺安堂上客
此心還與應門期

清樾蘭皋百畝陰
兩椽精舍倚雲深
一鞭春事東風裏
劉表何人識此心

因題前詩偶書

山林長往廟堂居一襲時衣飯兩孟溫飽較來均大槩
忍尋機穽博頭顱

挽趙教授公淨

目擊冠裳一老儒爭教滄海失遺珠細思晚起山齋語
地下修文事本無

淵源分派大中君偶讀殘碑得古文河潤祇能霑再世
不須回首愴蒿君

儒林游戲入禪關
晚節浮沉里社間
異日衛人徵故事
為公援例取香山

辛苦生平篆刻勞
也需汀草亂春袍
有兒不肄中郎業
却是先生一著高

是是非非到蓋棺
誤身無似戴儒冠
蒼涼一片空山月
照徹先生苜蓿盤

生理蕭條奈老何
春風著處是行窩
哀歌偶及生存事
却恐羊曇淚更多

因著圖經大起予發揚潛德到幽墟案頭幾卷遺編在
愛惜過於汲冢書

跋申達夫藍采和扇頭

一踏高歌了世緣春風兩袖地行仙無端忙殺癡兒輩
貫朽都來有幾錢

謁梁太師王彥章祠

太師祠廟汶城西塚土纍纍日漸低唯有英聲消不得
至今高興泰山齊

雨後溪田即事

朝來一雨曙光微
高樹涼多露未晞
喜約老農來看稼
不辭霑溼芰荷衣

清寒墟落漲秋濤
溪上行吟樂已陶
洞口未容烟鎖斷
更須時上武陵舸

平明新漲復溪痕
曉月搖光映棘門
騷客不愁漁箔短
縱教魚鱉長兒孫

三年耕養一經通
水旱豐凶更在中
貢法不來神聽遠

此生窮達仰天公

種樹書殘倚釣竿日長微暑喜清寒
華堂去水無多地雙足時來踏碧瀾

錄役者語

十人供役二三迴困似車輪半道摧
眼底去留生死隔爭如先作陌頭灰

士戰何年是了期為王從此不知疲
一門親削宣尼筆為國勞民貴有時

一夫詛祭九魂知護我南行爾亦歸惆悵桑乾河畔月
至今寒影慘無輝

或云河南役夫既罷歸九者皆歿其一負衆骨而西
渡盧溝因祭而祝曰今汝等既歿我幸獨全抱汝骨
以歸汝等有靈當佑我使與汝父母妻子行相見也
其人前次范陽亦病死

工無役鬼必勤民萬雉功成歲月因從古有庸三日止
未聞膏血化灰塵

今春疫氣是天災百日為期力儘能三尺席菴連雨夜
杵聲纔歇哭聲來

火中渙汗土中蘇却被車轟殞半途六月炎風一千里
大河南北看巢居

病骸困苦自知休叮囑同行瘞故丘父母祇知安健在
計程今日過盧溝

父來接子值同途欲話渠儂涕泗俱昨日道邊因困臥
不知今日有還無

病軀甫瘥須扶護趣伴貪程日夜奔大半瘳遺多為此
故鄉歸去有殘魂

蕩蕩王城玉削裁青山三面壯圖開興功計產能中止
狼籍春風一露臺

數口為家尚聚廬一王經野古良圖限期百日非為遠
部役羣工事太劬

觀風浪中回舟

風蕩輕舟一葉迴望中掀舞碧濤堆舟人若解臨觀恐

迂緩甘從遠道來

清溪晚眺

洲渚橫陳水退餘
兩行風柳映菰蒲
暝烟誰踏扁舟去
望際漁燈一點孤

題陳德秀東臺手卷

井落星躔一炬殘
市門留入畫圖看
祇應千載東臺月
長照鄉人說社壇

至元戊辰應聘憲臺留別淇上諸公夢中得

金馬門中金馬臣銅駝巷陌歲華新閒雲也被風吹散
去作千門萬戶春

竹林幽隱圖

西晉風流號七賢筆牀茶竈共林烟嵇琴響絕千年後
喜見清風一再傳

清時有味此閒身不可一日無此君著脚歲寒堂上去
秋風門外葉繽紛

蘇嶺桑麻杜曲田歲寒誰似見君賢鳴歌不種南山豆

千畝風烟學渭川

昔賢愛竹與竹友出處總得高人名今人未著林頭屐
里社歸來畫錦榮

共城瀟洒似江南萬竹幽棲老所堪李沆似為諸子計
北山先掃讀書龕

烟雨溪南百畝春盡將清景屬閒身河山不隔黃壚斷
却恐功名老逼人

春夜獨坐

讀書聲歇燭華殘潤入琴絃覺夜寒寂寞小窓雲影薄
隔簾梧葉雨聲乾

仙遊曲五絕

春山雲白紫芝肥歲歲征騑動漢儀政自修身傳治本
不緣幽睡試希夷

鶴護龍香醺夜壇露桃花影記驂鸞碧雲暮合秋空迥
石上清風漠漠寒

庭竹無人綠滿窓幽香和露溼霓幢日長孤絕壇邊鶴

啄徧晴苔影一雙

漢家拜望竹宮壇環珮聲沉碧落寒
遙憶受釐宣室夜
一言前席萬方安

金簡朝元擁玉華
碧壺香滿謫仙家
石壇冷桂銀潢水
會待秋風送客槎

六度寺

荒村到寺纔一里
古屋懸崖廢幾間
從此重經題品過
衛人方識有壇山

山下石田百畝餘子孫眷戀祖來居向人爭說新官好
二稅輸來雜泛無

縈紆一水蟠深澗野叟何知說太公壇下古碑堪晤語
大書深刻太康中

太行東麓太公泉喬木蒼烟擁壞垣千載祗應尊有德
不須深泥竹書言

老鶻鋪雛百丈崖羽毛纔覈獵人來孤懷牢落風埃底
何處呼鷹是故臺

聖泉流潤過南村共說來年雨水勻
山若有靈能假手
六花先壓壠頭塵

支撐佛宇老風烟歲月仍題聖
歷年零落亂山終悵望
捫蘿應欠入香泉

先子能聲以吏聞生平遊戲見詩文
遺書忽入孤兒眼
淚洒西山日暮雲

鷹揚來自鎬函西草木荒山壁壘低
賣食解牛真妄說
斷碑明指是殷溪

山中宿麥苦無多喜見團科際雨坡縱未庸收終有望
入城容易揭差科

同劉勸農彥和葛縣令祐之遊蒼谷口

四山遮盡外來風山崦人家不覺冬獨立蒼崖重回首
山形渾似入居庸

夕陽西下暮山稠崖下蒼池似炭湫把釣不愁雷火出
品題應為此山留

近山風俗果溫純知有從來縣令尊癯老杖扶爭致語

不嫌山野過柴門

山神說是宰官身
野老爭來話本因
採玉得仙俱恍惚
至今功利及斯民

九龍分部中天雨
何處癡蟠睡不開
一勺鳳凰山水下
有時風雨洗天來

方山忽斷兩崖開
中有蒼河自北來
行出山門俱不見
玉龍翻作地中雷

不須屏火瞰蒼灣
萬古幽陰鬼所寰
山下黃塵三百丈

巢居安忍插天山

地爐火在壁燈昏睡覺山堂笑語溫
豆粥一盂官事了
緩搖吟轡出山門

贈星斗客冷景發

六甲星躔入苦心術窮滄海別穿深
滕王閣上三盃酒
曾博相如換賦金

萬類芸芸固不齊一推能盡未來機
向渠待闕
福

早晚台光映紫微

炯炯雙瞳楚語紛闌懷陰竄失崖垠坡仙有句堪書贈
醉裏微言更近真

有命何曾論智愚班超傭筆衛青奴自從遇着洪都客
豁得胷中俊氣無

半生心事苦蹉跎其奈胷中不朽何鳬鶴短長俱有數
魯卿三昧聖之和

遊霖落山雜詩

東山削出翠芙蓉西壑崦嵫貯雪風人說魏王曾避暑

殿基猶是舊離宮


隆嵒悲臺倚寺西山空
留在舊禪扉老猿呌月蒼烟去
曾伴山僧夜半歸

青山斷處塔層層
廢殿臨崖枕虎形
千丈畫屏宜晚對
野烟飛去助空青

絕磴穿雲老蘚蒼
捫蘿行到贊公房
寶香今徹華嚴壁
木客猶誇夜有光

滴乳巖前挂瀑流
青林飛洒動高秋
玉龍躍入青冥去

堆疊蒼烟萬壑愁



秋澗集卷二十四

欽定四庫全書

集部

秋澗集卷二十五至
七

詳校官侍讀學士_臣沈咸熙

侍讀_臣孫球覆勘

總校官降調編修_臣倉聖脉

校對官助教_臣汪錫魁

謄錄監生_臣朱鎮

欽定四庫全書

秋澗集卷二十五

元 王惲 撰

七言絕句

五年夏四月朔日即事

朝衣絺綌暮綿裘
氣運天和不自由
吹損綠陰風不定
晚來庭院似深秋

贈周幹臣

槐府潭潭吏隱周青衫騎馬亦風流入門休問生涯事
讀罷離騷待菊秋

題風雨回舟圖

江雨江烟萬里秋幾年汗漫事長游憐君已落風波裏
只恐回舟不自由

題王武子觀馬圖

五花吹散滿身雲掣電追風八駿奔好尚祇誇毛骨異
不思戎馬在東門

題李伯時所畫開元御馬圖

閱武驪山是近游
霜蹄蹴踏厭長楸
料應扈從東封了
一片烟雲赤岸秋

題山堂會琴圖

靜夜山堂萬籟沉
抱琴來泄古人心
個中真趣知誰會
門外松風是賞音

聖賢思治先琴事
子賤為邦舜阜民
莫訝松軒來會數
要從心指起經綸

寄潞尹侯伯祿

分攜不及都門別情話長懷午夜燈
蘭省未妨虛儉幕
郡人爭喜識黃丞

太行絕頂潞州城竹馬兒童遠見迎
聞說下車公事簡
不勞衙鼓報新聲

題李伯時畫支遁觀馬圖

晉人大槩尚虛談外物遷移等徇貪
千丈神光渠自有
却將神駿馬中參

金城店

麻葉翻風稻映畦
道邊垂柳蔭橫溪
一竿青旆誰家酒
金店東頭野約西

金城懷古

典午能延邂逅生
柘弓銀研未忘情
較量成濟揮戈慘
天道中還固未平

絳陽道中

山自南來兩翼開
分岡橫亘隔金臺
伯宗驅傳無輕去

聽取與人論絳災

絳州公廨即事

終朝據案訊累囚
日暗風淒動鬼幽
草黯池荒人不見
絳紗燈影看懸流

河東池館絳園優才守
豪王樂讌遊興

閑

見

斛王祠畔暮山稠

挈鷺提鷗次第開
碧圍丹障鎖重臺
可憐一炬成焦土
却似汚宮為世哀

樊守文章世已驚富公遺愛

閔

水

假借羣蛙徹夜鳴

鼓水西來竇北墉絳園形勝日增雄依稀罨畫樓臺影
猶在瑤翻碧歛中

水聲激激枕邊來臥看倡池碧鑑開三尺短碑樊記在
苦無多意發雄猜

莽望黃原勢際天驚驂南走削孤顛東臺何限消沉意
目送汾流落日邊

讀絳陽園池記

樊守文章未易窺艱深宜被後人譏一言能盡興衰理
愛殺當年李格非

周孔文章載道輒定刪原自典謨留不知魁紀操觚意
地絕天通孰與儔

題斛律王廟壁

玉壁威騰却日戈蜚謠其奈百升歌須知地下陂陀血
氣壓南山翠不磨

祝融堆廩表韓公神理雖冥正可通自愧不求來折獄
亦蒙陰相誘愚衷

過絳州北哺饑坂

晉趙宣子飯靈輒處
也舊有祠屋今廢

釣采華名世有人微勞高擬泰山勲此心報德誠堪尚
事了身名兩不聞

血肉瘳牙白晝寒挾輪來脫趙鄉艱悠悠鶴蓋陰中子
高揖清風恐厚顏

晉國平時有殍夫趙宣為政果何如哺飢坡下重回首

一飯酬恩實起予

題夏當務壁

村落人家櫛比稠
平時分水細為籌
朝來一雨郊原足
門外長溝滿意流

龍祠禱雨

巾岸烏紗角半摧
馬蹄泥滑晚相催
郡人莫訝麻衣溼
適自龍祠禱雨回

禱雨龍祠訪張總判不遇因題其壁

甲第分攜半月餘
遠回相過得須臾
松陰滿院溪流碧
孤負臨風一捋鬚

登白雲樓

百日區區簿領間
白雲樓閣幾憑欄
秋來政有西山爽
兩度還容拄笏看

山次雲高暑退初
簾紋如水葛衣疎
邇來郡府無多事
臥對西山把性書

贈墨卿秦得真

壯心零落羽林槍
老劑玄圭入退藏
為報鳳池池上客
不應神品擅潘張

麝團小印柳枝龍
不減唐人入漆工
留得玉堂揮翰日

桂香欄檻聽松風

聽一作泛

秋望

客窓十日雨聲中
雲影朝來綻碧空
不上西樓能幾日
滿城黃葉動西風

題子猷山陰圖

閉門一雪天地白乘興即上山陰船愛煞此君真率意
至今人境兩翛然

自嘲

踏月聞鷄出郡齋逐朝撾鼓放衙來盤盤三晉河山地
兵賦民情使汝諧

自壽

二年岱頂富奇觀今歲姑山對霧鬟笑拂巖花指歸路
黃塵深處是人間

待旦軒假寐而作

待旦軒虛曙色分瓦爐煙煖有餘薰細思日用無多事
一靜能消萬有紛

題永安刁氏別墅壁

一川百頃數家邨瓊嶺重岡擁澗垠樹藝自勤民自儉
勸民冠蓋不須勤

南崖刻畫似城闔北勢耕桑聚落勻所願廟堂論至理
萬方風俗再還醇

聚遠亭刁氏別墅

壁間題示墨猶新聚遠軒中入幕賓還喜晉人風土舊
一邨名姓似朱陳

莊武王馬燧廟

北平英氣凜如生千古精忠勒御名過客賦詩增感激
西風原上鼓鼙聲

奔鯨吹浪蕩蒲津堂上奇兵算已神老賊垂降還赴召
比量先軫乃純臣

汾雕懷古三首

坤倪三面削蒼崖中擁汾雕寶氣開夾道老槐君莫訝
亂枝曾拂漢旗來

武皇誇大喜雄為鼎出汾陰恐事奇更著壽王相嫵媚
守經深見漢儒卑

東封泰岱西汾陰始自嬴劉好侈心只為一非無所格
儘令方士出妖淫

過聞喜縣有懷元鼎故事

窮兵無似漢皇雄六合為家意未充一喜政能留故事
舞干終愧有虞風

過太寧宮

披雲臺晚野烟荒宮掖坊深半夕陽獨有太寧祠畔土
碧花猶自學宮粧

安邑道中

匡牆烟火暮微茫樂歲人家半未康漢至孝文纔四葉
便能三萬里農桑

謁司馬溫公墓

河山兩界夏西分
孕秀鍾靈產異人
可惜秉鈞纔八月
不教仁澤浸生民

鳴條山遠聳孤墳
千古嵩高仰甫申
有意誕彌無實用
竟將新法逐詞臣

遊棲巖寺七絕

上盡雲間十二盤
一杯松下散襟顏
老僧近晚堅留客
爭指西南見華山

河山形勝見棲巖萬壑秋聲度碧杉奇絕此遊還有恨
杖藜不到冷雲菴

翠巖迴抱鬱蒼顏絕境軒橫杳靄間老矣瑞峯應健在

護持長伴八龍間

字文周末年大禁釋教有曇延師者
遜隱北山久之有樵叟曰來聽經後

師道成復有七人者來師問故曰余八人
皆龍也其一已傳師教故余等亦來受戒

一徑縈紆入杳冥望川亭迥夕陽明欲知眼界寬多少
放出秦川似掌平

層巖重倚尚斜陽山下風烟一漫蒼恨煞愛山王老子

不來同宿贊公房

暮烟遮斷嶽蓮青
低壓河流一線明
已被山靈嫌俗駕
更堪留榜彥倫名

安然乘馬到烟蘿
一笑山間對鳥窠
詩句滿前拈不得

一作出風烟還比石樓多

鐘聲出谷尚依依
穩送詩人帶暝歸
自笑野猿山鳥性
夜深幽夢到巖扉

跋提刑王副使航海圖

天險無踰海與江得人一葦即能航懸知恢廓高宗志
夢繞商巖夜月蒼

鯨翻鼉作大江流舟楫顛危咽棹謳忽展畫圖還自悟
當年風雨過封丘

遊普救寺

晚寺人歸憶會真夢雲花氣鎖窓春重簾不隔西廂月
一點香來是襪塵

讀破口先事迹

釋氏功夫向上尋一身歸寂雪山陰片言能脫盈城命
少似先公濟物心

贈船蓬姚道人

一龕塊坐已忘身陸海船蓬別有春却為梨花枝上雪
等閒踏破綠苔茵

臨晉道中

野雪晴消滿道泥茫茫銀海際烟霏日斜信馬中條北
愛煞山光照客衣

春雪

小雪霏微不滿空
亂穿庭樹舞春風
餘威似掣調元肘
不與東皇擅化工

曳龜圖

駁說濶翻已自欺
更堪身世兩相遺
抱麟痛為東周泣
爭遣宣尼不及時

公堂午後吏散一首

吏散公庭日轉西
蟻旋蜂靜闕無時
人無定志常居遠

悄悄孤懷祇自知

清明後一日作

里巷春遊鬪鈿車
午窓睡起日西斜
閒書讀罷焚香坐
淡對一枝山杏花

卧數窓櫺對日曛
一簾晴影弄游塵
隣牆幾片桃花雨
點破苔階更可人

懊惱春悵困宿醒
偶隨游子到溪亭
多情幾樹城南柳
三度春風見汝青

跋李提點和甫筠溪亭

和甫開封人
早年應神童

碧鮮庭戶玉琤琮影透疎簾翠幾重中有道人高節在
青青初不易秋冬

洗耳無煩近潁川虛心獨愛此君賢何時拄杖敲門去
讀罷離騷聽夜泉

題鄆縣簿雷損之景程齋詩卷

道統幾微孰繼傳景程還得此名賢須知二帝三王事
要以仁民愛物先

理窟名言擬典墳發源伊洛見經綸千年鄆杜遺風在
更著雷卿繼後塵

題田使者玉泉垂釣圖

渭畋應未兆非熊底是曾蟠萬丈虹辦與澄湖三百頃
一絲斜裊綠楊風

挽平陽教授崔君度

心醉羣經四十年老成身後見波瀾蒼涼一片姑山月
空照先生首著盤

孟浩然灞橋圖

金鑒消息遠相招雪滿吟鞍過灞橋處士本無經世志
強將詩句杜清朝

高鳳漂麥圖

疾雷破柱雨翻盆甑墮何煩顧惜頻倘為把書都不省
先生應是太癡人

跋蘇武持節圖

使華往返見交兵老我何嘗繫重輕已分橫身膏草野

茂陵松柏夢秋聲

君臣義合以忠持十九年間節可知
邂逅論闕幾悔死

區區纔得典諸夷

兩行衰淚血沾襟一節酌恩北海深
衛律有知慙即死更來遊說此何心

慶趙汲古八秩之壽

效樂天體

人生八十今極壽况復兒孫滿眼前
汲古園中趙夫子

燕京城裏地行仙

摩挲金狄門前客精健耆英會裏人坐對天津橋畔月
池塘春草幾回新

崇慶初年縈組綬至元八載享康寧人間八秋風流事
無似君家種德馨

至元辛未歲八月十二日拉馬都事才卿遊韓
氏南莊歸效樂天體得詩十絕皆書目前所見
覺信手拈來也

開門不問主人無幽鳥時來應竹呼僮僕已知賓客敬

與奴白飯馬青芻

吟邊踏破綠苔堦自挂幽軒數菊栽半日杖藜橫膝坐
絕勝前日醉歌來

浮雲冠蓋六街塵老盡朱顏白髮新贏得身心兩閒在
水邊林下果何人

滿庭竹影鎖秋烟倒盡池蓮看菊斑墻外綠畦澆已徧
一園秋老桔槔閒

小亭獨坐淡忘機山鳥山花笑我癡萬事看來皆偶爾

此間休遣世人知

亭臺涼吹晚留連樹遶岡回自一川
野菽未霜溪柳盡烟光渾是早秋天

陶園松菊餘秋色趙氏林亭滿夕霏
人自晚年多靜暇每來吟賞便忘歸

淡雲烟樹事幽尋指點平蕪起醉吟
但使眼前無俗子一杯時與野人斟

醉墨淋漓字半斜枉將霜壁亂雲遮
一杯先洗黃泥瘴

似我閒情遠世譁

蛙鳴水底強為聲
酒盡沙頭卧玉鉶
我自近來無不是
白雲舒卷暮山青

裴晉公綠野探梅圖

息軒筆

淮西平後兩河清
綠野梅花照眼明
霜鬢未容閒裏老
南枝消息要和羹

當年韓白兩詞人
吟賞天教在相門
邂逅有詩窮勝事
最憐疎影月黃昏

東臯八咏為趙參謀題

匏瓜亭

君家匏瓜盡樽彝金玉雖良適用齊為報主人多釀酒
葫蘆從此大家題

幸齋

人生知足一瓢多未老得閒非幸何堪笑矯情楊子幼
嗚嗚空縱醉時歌

東臯邨

陽春門外望東臯三載相邀醉濁醪
早晚回溪溪上路
桃花紅雨滿漁舸

耘軒

草盛苗稀苦見侵荷鋤歸晚月生林
須知種豆南山意
唯有淵明識此心

遐觀臺

自說無堪不出村一杯藜藿樂閒身
就中不負登臨興
滿眼青山是故人

清斯池

塵冠挂後無纓濯漁父從歌濁與清待與田家占水旱
年年池上聽蛙聲

流憩園

養素丘園趣已成斜陽林影看春耕手中三尺枯藤杖
不羨人間六印榮

歸雲臺

從龍致雨固油然巖壑歸飛意本閒況是東臯已沾足

不妨來伴宿簷間

夢中又賦開元御馬圖

毛龍天降馭龍韜歷塊過都乃爾曹安得錦韉三萬騎
令浮秋水下江皋

予寓舍前有所謂水官珠者客曰此即薏苡也
因呼兒採實作詩以識之

堂前薏苡因人悟不處嫌疑至言豈獨斐萋成貝錦
令人還憾伏波寬

讀開元雜事

水殿涼多暑氣微
薰風華萼正相輝
爭教明月梨花院
玉笛聲長到枕幃

興慶宮池景氣深
薰然四海友于心
讓皇篤愛情尤切
力為君王辨八音

海棠紅綴棣華零
樂裏西涼已變聲
總把大衾長枕夢
老天移魄入華清

歸去來圖

長沙勲業武侯忠劉宋規摹操懿雄虐焰儘烘寰宇裂
五株楊柳自春風

彭澤遺黎不幸何斜川魚鳥共婆娑先生踐迹高千古
不似終南捷徑多

解綬歸來百日強東籬松菊未全荒細觀厯贊高賢傳
一出頭來恨已長

煮茶

枯腸拍塞貯春雲洗盡鶯煩六腑昏山木策勲存夜氣

天河流潤下崑崙

宵中宿酒闌殘兵一椀澆來敵陣平
蒙頂得仙疑妄語
月波千丈與詩清

瀟瀟風雪薄虛窓
細貯槍旗煮夜缸
若論廓清真武事
一天幽思為詩降

四皓圖

羽翼橫飛四皓鴻
楚歌悲絕趙王宮
高皇英睿商賢節
俱墜留侯計畫中

萬古規模一漢皇
保全母后捨僊王
商山邂逅招園綺
出自留侯畏呂強

題楊息軒盤谷圖

石峪盤盤百畝蒿
野烟秋色淡林臯
雄文一出潮陽筆
頓覺山人索價高

關山秋霽圖

望京樓上晚凭欄
常記居庸八月還
一段紫烟吟不盡
枉分秋色與南山

生平懷霽是初心捲盡江山萬里陰
十載夕佳亭上客
卷中還對玉千岑

甯戚叩角圖

舜授堯傳老不逢商歌愁絕國門東
小哉恨煞夷吾器
竟列齊桓五霸中

五王避暑圖

挈幄留香郁棣華紅雲縈暖鵲鴿沙
豆箕不免陳思嘆
朱李寒泉是浪誇

蓮鳥窺魚圖

嘴距初非搏擊流翠香深處樂清幽游魚何限相吞噬
祇得臨風一瞪休

門帖子

廩食京華兩見春全家飽暖荷深恩自慙補報應無地
夢到青蒲白獸尊

題袁安臥雪圖

曲突無烟雪擁關引書高臥自怡顏須知四世三公業

不在人情冷暖間

突不烟黔雪擁扉一編義易療朝飢火城莫羨沙堤相
論士當觀未遇時

窮巷無人與叩關長安風雪一家寒挺然不為飢驅去
肯逐時人作熱官

題顯宗承華殿墨戲

大青小青兩龍種承華墨戲真天人春思欲見昇平事
立仗歸來不動塵

題東海徐白魚

點額雷燒不到渠
相忘何必在江湖
細吹藻荇充飢了
兩頷腥涎儘自濡

酬答宋先生子岳六首

山立揚休七十春
閒中今古醉中真
傷心麗澤堂前月
空照先生漉酒巾

一代波瀾獨老成
百年人物見耆英
茂陵身後多遺藁
一賦梅花到廣平

我識空澄海印心生平遊戲在禪林寶珠儘照青藜杖
雅韻先空綠綺琴

玉堂仙去渺翩翩冷落梅花樹下禪疇昔過庭言在耳
炷香傾酒大蘇前

水映林亭竹映山四時風景樂天閒一從零落丘山夢
頓覺風光向客慳

酒榼詩筒白玉珂春風到處是行窩百年愛仰都人士
哀此羊曇淚更多

跋龍陽松隱圖

學君象數別穿深又向龍陽得洗心前日小山叢桂客
不煩春草賦歸吟

承華殿墨戲圖

天廐雲屯八尺龍總輸神駿付青宮細看絕電流雲筆
天寶諸王恐未工

主人愛馬憐神駿一骨千金什襲藏却恐雷霆還下取
九重天上看龍驤

感寓

逢人驚問但慙然自信文章老益堅
來坐癡牀一千日
恰如無事草鞋禪

至元七年十月二十二日過順州與梁御史話
金節侯剛忠王公子明死節事馬上為賦此詩
以弔州舊治唐歸順州見大厯五年試太子洗
馬鄭宣力所撰開元寺碑

雉堞蜿蜒隱瑰城剛忠於此歿天兵千年英氣如生在

草木風前動戰聲

題趙仲器銅芝膽瓶滴

陂陀金背兩眉酥不屬官池與研居老筆策勲餘潤在
一生何啻五車書

足跡蹒跚几硯間太陰何苦汝為餐寸腸不磔盧仝鐵
更吐陰寒上筆端

題張夢卿雙清圖

月影冰魂奪化工捋鬚直是不凡公漫山正有閒桃李

爛漫春風幾日紅

花光品格黃華筆一段風流付後人誰為九衢塵坌底
兩枝搖蕩浙江春

淡妝疎影兩依依點綴橫斜畫總宜恰似孤山籬落畔
小溪如練月如眉

王右丞輞川圖

騷詠禪談意未央
欹湖烟月墮微茫
園林鐘鼓清時樂
好個裴公綠野堂

狀物何如及物功
開元真宰說姚崇
未妨僦屋招提裏
斗米三錢四海同

凝碧池邊野鹿過
空垂雙泣賦悲歌
論忠不到平原列
馳譽丹青未足多

文采風流映一時
丹青三昧有餘師
戲將萬斛歌湖水
寫盡南山五字詩

遷張氏新居四首

我自三遷到巽隅
市朝雖近似郊居
東隣有竇西鄰許

不羨門多長者車

院靜窓虛淑景閒
戎葵凝笑海榴丹
莫令兒輩輕傷折
為與渠儂理一般

聽雪思堂與筆耕
主人寓意強為名
錙銖得及斯民了
日出何方事又生

羞將勲業鏡中看
不為無魚動鉞彈
兩鬢總隨霜簡白
寸心虛傍日華丹

題秋江月夜摘阮圖

月夜朱絃激烈聞縱橫詞舌得儀秦忘言何似陶元亮
直作羲皇向上人

易水悲風動急彈小絃鏗爾摘銅丸多應一片松梢月
併入茅亭作夜寒

闕下元日口號五首

筍班春仗發初齊贊馬行牽望拜時臘雪未消雙鳳瓦
春風先到萬年枝

平明瑞雪滿蓬萊島樹瓊花次第開人在建章馳道外

四邊鞍馬唱歌來

建章宮樹玉嶙峋雲近蓬萊氣自春
帳殿忽開齊舞蹈
紫衣獨見海東人

春前移仗島東邊大禮稱觴最重年
何幸小臣陪虎拜
一杯春露共瞻天

千官錫宴瞻天喜萬里休兵立仗閒
擬效堯封三獻祝
太平天子壽南山

魏豹故城

兵涉西河豹出迎亡姬還作漢儀程事機倚伏真相戲
一笑長驅過故城

題解梁廨壁

丘壘依稀井幹殘人家烟火甫兵還就中不負官曹眼
簿領堂前坐看山

再過絳陽

二年三度過金臺盛暑祁寒不憚懷臥聽水聲何所憶
一軒秋雨竹間來

夜宿李氏林館

困眠欹枕未容休
睡起關心事最幽
鸚鵡一聲寔色曙
月明滿地綠陰稠

禹廟

大地河山繡錯明
野烟孤廟枕荒城
杜鵑饒舌知何事
血洒東風怨未平

路村道中

鹽澤條山動寵光
天書來坼紫泥香
老癯扶杖欣相告

五十年來未省嘗

解州廳壁題示

至元癸酉五月二十三日奉宣明詔至於解梁因得
王貴州壁間所題解池詩序云鹽池之大自唐以來
凡臨蒞者無一辭以紀勝槩觀覽之際竒然成章或
繼之者實自予始僕竊有所感焉因勉成三詩以附
驥尾之末庶幾因公而使天下知有憚云偕來者府
兵曹解禎子公孺侍行承直郎平陽總判汲郡王憚

題

物色分留付後人
暗將風雅欲誰親
琨珠在側知形穢
尚友何妨繼後塵

日融池面爛生紅
更著南山障碧空
一夜高臺汗如洗
州人說是廣南風

解梁城下解鹽池
萬寶騰光奪目暉
我欲大觀窮化窟
乳泉一賦了天機

題平正縣堡樓壁

盤盤峻嶺上青山兩度南來點堡翻
义手老兵前致語
此回霜鬢又加繁

秋澗集卷二十五

欽定四庫全書

秋澗集卷二十六

元 王惲 撰

七言絕句

華嶽廟留題

朝來松檜重烟霏
仰面蓮峯翠撲衣
自笑愛山心不足
日斜猶未駐征騑

祠前喬木老輪囷
閱盡長安道上人
千古倚空仙掌在

好為回首障兵塵

蓮峯卓拔見雄尊
千劫孤撐碧玉盆
總被少陵收拾却
諸山羅列似兒孫

乖崖一出著高勲
回首猶慙華頂雲
應笑豹林种處士
擬將虛譽售時君

東登岱頂雪彌空
上徹中封似不逢
應有此行何豁敞
青天白日對三峯

渡渭有感

當年尚父欲誰親
八十西來釣渭濱
馬上行人應未了
莫教虛負百年身

秦亡漢起兩悠悠
總把興亡入海流
汀樹岸花三百曲
烟波都屬釣魚舟

安邑道中

六合雲蒸一氣埋
際空秋稼委枯荄
馬頭赤日疑無色
望斷青林雨氣來

洪洞道中望霍岳諸峯

老澗彎環兩翼分一川草木氣如薰土人更說山靈異
欲雨先占霍頂雲

留題霍嶽

喜遂平時景霍心適逢嚴祀一登臨感通固愧潮陽筆
霧雨重開萬壑陰

山腰明霽靜烟霏嶽頂雲濛淡欲飛巖壑似供詩筆健
法身都挂六銖衣

題豫讓橋

死堅鐵石表孤忠一水曾蟠萬丈虹太史注書隨俠例
豈知風義本無同

過盆昌橋

盤盤危磴轉山腰下瞰長河漲怒濤霍邑南邊趙城北
滿頭風雨過昌橋

霍州

四擁中坳一褰牢快心唯有霍山高一條甌水從中過
日夜隔城聞怒號

跋范蠡歸湖圖

霸越高歟土苴如五湖歸隱號陶朱扁舟共載西施去
却恐時人是厚誣

題趙城縣環翠亭

秀色四圍供坐嘯山城終歲早休衙陂塘清淺知秧稻
畝嶺橫縱看藝麻

簡城南北幾經還赤日紅塵赭背顏歛得解鞍心適喜
暫容高臥對東山

趙城道中早發

積雨晴來露氣餘
風枝成滴草垂珠
麻衣半溼溪邊路
常記郊原五月居

跋米元章蘆鴈圖

西風萬里下衡陽
水宿雲飛固自雙
似為叫羣心事苦
不教相映睡秋江

煙渚潮空退暮沙
依稀寒影落蒹葭
何人解化雙飛翼
拍拍隨君問使華

甲戌歲門帖子

全家溫飽荷恩榮
闔郡清寧歲屢登
蟣虱小臣何所報
一公之外復何能

不求富有金成穴
不羨官榮日九遷
但願時和身健在
大家無事過今年

庖舍門帖子

王家供具乳蒸豚
石氏庖厨蠟代薪
二者侈荒何足論
一簞顏巷世歸仁

山市晴嵐

墟落人家半夕暉
太行天上倚烟霏
喚回二十年前夢
共伯城西載酒歸

古栢寒鴉

亂鴉蒼栢晚相依
流水孤邨句未奇
恰似首陽祠下看
夕光翻影上枯枝

松蔭寒泉

坐蔭髯龍夢已醒
更堪幽谷亂泉聲
遙知綠綺相逢夜

幽思中含太古情

雲竇飛湍

千丈懸淙落碧霄百巖回望冷瀟瀟
若為借得天瓢手
傾向人間救旱苗

蒲中十詠為巖鄉師君賦并序

中條山水雄秀照映河華予兩年以事抵蒲畧獲遊
賞然雲烟勝概旦夕不去其懷嘗思以數語道其髣
髴心在而未暇也至元十年秋九月蒲人師巖鄉拉

王國器李仲和張師德諸人攜酒過門盃數行袖出
錦囊巨軸曰此蒲中十詠也因徵詩於不肖逮明年
甲戌正月辛巳予以微恙閉閣少休隱几瞑坐神與
境會既覺晴日滿窓幽思發越眷焉十題卒然而就
顧不足發山水之清音聊以移方寸而外形骸也且
為四老人一胡盧云

蒲津晚渡

落日西風送棹謳行人無數立沙頭君看一葉顛危甚

何不忙時且少休

舜殿薰風

巖廊瀟洒壓城闌
解慍歌殘又幾春
一道殿簷涼似水
至今猶有夢華人

虞坂曉發

雞聲茅店月微茫
山遠行人促曉裝
良驥虺隤隕身自健
不須拭目認孫陽

首陽晴雪

前冬兩拜首陽祠
野雪搖光晚霽時
蒼栢滿山人欲去
亂鴉翻影上枯枝

鶴鵲波聲

洶洶河流入斷山
馮夷無力障狂瀾
東風破浪他年事
且挽清雄上筆端

東林夜雨

瀟瀟風雨暗秋山
聲滿疎林萬珮環
拂曉開門看晴霽
白雲依舊伴僧閒

林亭夜月

大內扶君不見人
野烟碧樹總傷神
應憐一片林亭月
曾照司空淚滿襟

王官飛湍

石竇懸流雪練飛
夜深和月映松扉
恨予不遇貽溪老
一笑山間說化機

西巖疊嶽

東山如髻鬱重重
人倚西巖第一峯
似是晚烟開畫障

濃揮淡抹關丰容

媯汭夕陽

溪痕春漲碧迢迢一帶斜陽映野橋
風土亦安釐降意
野花如靨點裙腰

贈寫真賈生

氣貌昂藏野鶴姿賈生模寫有餘師
情知不入麒麟畫
剛為天朝飾羽儀

秋澗集卷二十六